

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

24 Juillet 2020

02 Dhul-Hijjah 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Duahs (Invocations) (Pt. 3)

Alhamdulillah Summa Alhamdulillah, Allah (swt) donne moi le *Tawfiq* pou continuer mo Khutba lors *duahs*.

Ô Allah, Toi Qui Le Remède de mo bane blessures, aide mo lé cœur ki pé souffert.

Ô mo Allah, sans Toi, mo la vie ene nannié du tout. Avec ene tel la vie, li meilleur mort ki reste dans sa le monde là sans Toi.

Ô Allah, donne moi la volonté et le courage afin ki To satisfait avec moi pou sa grand travail et responsabilité ki To fine mette lors mo zépaul. Si Toi, To content avec moi et mo travail ki mo pé faire, même si dimounes dire mo ene fou, ene imposteur, ridiculise moi, mette blâme lors moi, abaisse mo l'honneur et mo dignité, sa pas affecter moi ; parceki c'est Toi Qui donne l'honneur, dignité à ki To oulé. Mo la vie, mo l'honneur, mo nourriture, tous trouve avec Toi, pas avec sa bane imbéciles là.

Ô Allah! Mette sa du feu, la flamme ki vine du ciel là dans mo lé cœur pou amène
« *thousands of lost souls in the fold of Sahih al Islam* », *Insha-Allah*.

Ô Allah, tous mo bane parties sacrifier pou Toi. Mo pas conne nannié dans To la religion ; mo ene *Ummi*. Pou mo pas dire ki mo bien faible dans To *Deen*, mo ene zéro. Donne-moi connaissance, mette la lumière de connaissance dans mo l'esprit et lé cœur et donne moi la force, courage, l'énergie pou distribuer sa connaissance là avec l'humanité en générale et particulièrement avec bane frères et sœurs de la foi Islamique.

Ô Allah! Faire ene miracle et envoie bane dimounes vers Quran, To livre ki péna aucaine doute là-dans et ene guide pou celui ki envie prend le droit chemin. Enlève sa voile là de zot liziés et faire zot comprend To Livre Sacré ki To ti révèle To bien-aimé prophète (saws).

Ô Allah! Jardin (de l'Islam) fine sec ; tous bane fruits ki ti gagner siècle passé par To Messie ki To ti envoyer fine tomber dans sa siècle là. To fine élève moi pou nettoye sa jardin là et pou ré-donne la vie sa jardin sec là par To grâce kot pou regagne bane fruits et pou trouve partout vert, pas sec, kot chaque lizié pou attirer avec sa bane beautés ki trouve dans sa jardin là.

Ô Allah! Donne moi bane médicaments pou ki mo distribuer tous pays kot zot capave délivrer du mal.

Ô Allah! Azordi jours avec la main du peuple, la religion pé souffert et l'Islam dans ene l'état déplorable. Eski sa bane problèmes là pas fine arrive jusqu'à To Trône ?

Ô mo Allah, eski sa jolie visage de To la religion ki To fine parfaire là pou reste cachiette ?

Ô Allah! Dans sa siècle là, ena ene grand bataille spirituelle entre sa humble serviteur là, et Shaytan.

Ô Allah! Lé cœur pé batte fort à cause sa champ de bataille là. Tous bane prophètes de tous l'époques ti donne nouvelle de sa la guerre là et zot tous fine continuer faire *duahs* concernant sa.

Ô Allah! Donne moi la victoire lors Shaytan avec To la grâce, kot li pé rassembler tous so bane l'armée.

Ô Allah! Nous (tous bane ki fine croire dans To Khalifatullah et ki trouve zot dans sa bateau Sahih al Islam là) fine amène *Imaan* lors Toi et nous tous présent devant Toi. Sappe nous tous de bane problèmes de sa le monde là et céki pé attane nous dans *Aakhérat* aussi. Sappe nous avec bane malheurs de *Aakhérat* et accorde nous la paix éternelle et To miséricorde ki zamais pou fini.

Depuis ki nous fine reconnaitre Toi, nous ena ene contentement dans nous lé cœur et par To grâce nous pas dépanne de bane étrangers. Faire le Sahih al Islam vine ene source de bénédiction pour nous, et kot li pure de tous bane mauvais kitchoses et tentations ki pé guette nous et kot tous bane regards braqué lors nous.

Ô Allah, mo Bien-aimé, pas faire nous éloigner avec l'au-delà. Faire nous sacrifier beaucoup pou Toi dans sa le monde là pou ki nous gagne ene jolie récompense dans l'au-delà. Subir bane la peines à cause de Toi, li meilleur ki tous bane la joies.

Ô Allah ! Faire le Sahih al Islam vine ene source de bénédiction pou ki apporte la paix, tranquillité, et nous vine bane *Dai-illallah*, nous amène bane les autres aussi dans sa bateau là, nous amène zot vers Toi, Ô mo Allah!

Ô mo Allah! Tous céki fine rentre dans sa bateau (Sahih al Islam) là, c'est mo bane zenfants spirituelles. Protège zot, augmente zot connaissances dans la religion et zot du bien aussi pou ki zot capave dépense dans To chemin. Mette To grâce, To bénédiction, To *barakat* dans zot travail, dans zot business, faire ki To grâce tombe lors zot couma la pluie, augmente zot di biens par To bane pouvoirs ki To ena et guide zot toujours lors le droit chemin. Faire zot honnête dans zot travail, pas faire zot jaloux les autres, ni ena la haine pou les autres, même zot propre l'ennemies.

Ô Allah! Faire zot vivre toujours en accorité ; pas faire ena bane disputes, ni la guerre entre zot.

Ô Allah! To conne très bien ki couma sa pou affecter moi, pou donne moi la peine et l'heure là To pas pou capave guette To serviteur choisi souffère comme sa kot en retour To colère capave descendre vite lors zot.

Ô Allah! C'est mo bane zenfants spirituels. To conne bien ki kantité tracas mo prend pou mo bane zenfants, et surtout bane ki dans la peine, ki pé souffère, ki malade, ki péna la paix et tranquillité dans zot la caze, bane ki content discute pou nannié ditout, bane ki pas attache zot avec *Namaz, Zikr, Tilawat-e-Quran*, ki pas faire bane sacrifices financiers dans To chemin, ki pas observe le *Roza* et bane filles et madames ki pas observe le *Pardah*, ki cause avec bane z'hommes couma dire zot camarades sans aucaine respect.

Ô Allah! Toi Qui mo Témoin, mo prend To même comme mo Témoin. Combien des fois To fine montrer moi dans mo bane *Kashafs* (visions), dans rêves et même par révélations bane bien mauvais conduites de intél, kot mo tourne vers Toi, mo demande zot pardon, sans ki mo faire aucaine tapaze. Couma li vilain bane z'affaire ki To même, To montré moi ki intél pé faire lors WhatsApp, lors portable avec bane message bien indécents, bien malpropres, ki li garçons et ki li ti filles aussi. To conne bien ki kalité tous sa là affecter moi, affecter mo la santé, faire moi gagne peur pou zot conséquences dans l'avenir. Pou moi, plutôt ene l'ennemi joue moi nuit et jour, dire bane causer ki pas bizin lors moi, li pas pou affecter moi couma sa bane z'affaires ki To montrer moi céki pé passer là lors portable et WhatsApp.

Ô Allah! To témoin ki combien fois par jour mo demande zot pardon.

Ô Allah! Tous céki fine rentre dans sa bateau là, pé respire le parfum du ciel, bane tel parfum ki zamais parmi nous fine expérience sa auparavant, mais astère nous pas oulé ki ena rentre dans sa bateau là, avec bane mauvais l'esprit ki ena dans zot la tête, kot zot transforme sa parfum du ciel là en mauvais l'odeur.

Ô Allah! Si ena sa kalité dimoune dans sa bateau là, retire li parmi nous par To grâce. Nous pas oulé la quantité, mais la qualité ; bane ki pieux, ki ena *Taqwa*, ki ena respect ene envers l'autre et ki montrer ene l'obéissance totale envers To Serviteur Choisi (sa Humble Serviteur là).

Ô Allah! Toi Qui conne sakaine zot lé cœur, zot *Niyyat* (l'intention) ; pas faire parmi zot ena bane arrogants à cause zot richesses ou zot l'éducation, ou zot beauté, ou zot familles.

Ô Allah! Faire zot tous vine humble, ena beaucoup l'humilité, courber pli bas kot zot touche la terre nette. To fine donne nous l'exemple ene z'arbre kot pli li rapporte fruits, pli li courber, mais par contre ene pié ki péna fruit, li droite, et plutôt li faire tapaze beaucoup.

Ô Allah! To fine donne l'exemple dans tous céki To fine créer.

Ô Allah! Toi Qui aide moi, Toi Qui montré moi tous kitchoses ; mo pé plaide avec Toi pou mo bane zenfants spirituelles. Faire zot vine bon, faire zot gagne bon manière causer, faire bane madames et bane filles comporte zot bien, pas causer fore-fore, ni riyer fore-fore. Nous conne très bien céki Toi To fine faire nous comprend dans Quran et céki To prophète (saws) aussi fine dire. Faire bane madames vivre bien avec zot mari, et bane maris aussi vivre bien avec zot femmes. Pas faire ena bane disputes dans ménage lors bane tipti zaffaire et même si li ene zaffaire sérieux, faire ki sakaine parmi zot apprane pardonne zot camarade. Faudré pas pou oui ou non (problème arriver) nek prononce divorce ou sois madames cause bane causés contre zot maris, si jamais maris fine fauté, et kot alors ena coup zot faire tapaze, faire les autres conner ki kalité misère zot pé passer.

Ô mo Allah! Mo Bien-aimé ! Faire tous céki sincères ki fine rentre dans sa bateau là, faire zot vine bane bon zenfants.

Ô Allah! To même To ti donne moi sa révélation là plusieurs fois : Si moi mo content avec zot, Toi aussi To pou content avec zot et To pou dire bane anges aussi et bane pieux aussi pou content avec zot et là, zot pou trouve et témoigne bane signes d'Allah extraordinaire, ki avant sa zot pas ti trouver, ni témoigner.

Ô mo Allah! Accepter mo bane *duahs* ki mo pé faire avec Toi. Donne sakaine parmi zot ene bon la santé et ene longue la vie pou zot continuer servi To *Deen* et amène encore bane les autres bons dimounes, bane chercheurs de vérité, amène zot dans sa bateau là.

Ô mo Allah! Faire zot vine bon, faire zot vine bon Ô Allah, afin ki zot capave aide les autres. C'est To même nous Maître et péna personne pou être adorer à part Toi.

Ô Allah! To pas ena aucaine associé dans To l'adoration. Garde zot loin avec Shaytan, et garde zot sous To refuge et rempli zot lé cœur avec la lumière et la joie, envoie To miséricorde lors zot.

Ô mo Maître, accepter tous mo bane *duahs*. Mo prêt pou sacrifier mo la vie pou Toi. Aide moi, moi et tous mo bane zenfants spirituelles ki vine devant Toi avec beaucoup l'espoir. Faire Sahih al Islam vine ene bénédiction pou nous tous ; par To grâce, li ene Jamaat pure de tous bane mauvais ki pé guette nous ; pas laisse Shaytan approche avec nous.

Ô Allah! Tous nous bane zenfants ki fine prend naissance dans sa bateau là, donne zot bon la santé, ene longue la vie, éloigne zot de toute sortes l'obscurité, éclaire zot avec To la lumière, sappe zot de toute sorte kalités maladie et problèmes, envoie To grâce lors zot, faire zot vine bane bon zenfants, et zot grandi aussi comme bane bon zenfants, dans *Deen*. Éloigne zot avec tentation de Shaytan, faudré pas zot attacher avec portable, WhatsApp, Youtube, télévision ou bane les autres Réseaux Sociaux et gambling. Faire zot attacher avec Namaz dès ki zot arrive à l'âge de 7 ans, même lire le *Quran Shariff*, *Zikr*, lire bane attributs d'Allah et zot montrer beaucoup respect pou zot parents. Pas laisse zot commence attrape cigarette et fumée.

Ô mo Maître de l'univers écoute mo bane *duahs* et supplications. *Ameen, Summa Ameen*.

Mo faire *duahs* ki Allah (swt) donne moi *Tawfiq* pou mo continuer lors le même sujet la semaine prochaine. *Insha-Allah, Ameen*.